

Protocol no. 99Sezzüda da gövqia, als 05 da qün 201420.00h – 22.45h

**Preschaints:** Albert Mayer, Andri Poo, Men Caviezel, Dumeng Jann,  
Marianne Werro-Lehmann e Marco Fallet (protocol)

**Protocol**

Il protocol no. 98 da la sezzüda da mardi, als 20 da mai 2014 vain approvà.

**892 021 FABRICA**  
**Cumün politic da Sent; ingrondimaint (local sanitar cun duscha)**  
**e lavuors da sanaziun chamonna dal paster Darsüra; parcella no.**  
**1533**

La dumonda ais statta publichada e gnüda suottamissa al proceder dal BAB. Il permiss davart da l'uffizi chantunal cun diversas cundiziuns ais avantman. Seguond cumischiun da fabrica ais la fatschenda in uorden e madüra per gnir acconsentida. Il cussagl conced'ìl permiss cun vusch unanima quai in basa da las cundiziuns davart dal Chantun.

**893 011.300 Radunanzas, revisiun da quints e votumaziuns**  
**Radunanza cumünala dals 2 lügl 2014**

Il cussagl repassa la glista da tractandas e tilla fa bun. Quella po uschè gnir piazzada i'l prossem Mas-chalch.

**894 217.503.06 Sanaziun chasa da scoula**  
**Surdatta da lavuors**

Andri Poo preschainta las offertas examinadas e missas in net davart da la cumischiun dal proget. Il cussagl surdà quellas, seguond proposta da la cumischiun, adüna al plü favuraivel offerent, sco segua:

<b><u>Gener da lavur</u></b>	<b><u>Impraisa</u></b>	<b><u>Predsch</u></b>
- lavuors da liadüra - isolaziun cunter la chalur	Näff ScRL, Ramosch	fr. 31'174.00
- lavuors da marangun	cumünanza da lavur Otto Scandella, Sent e Foffa & Conrad SA, Scuol	fr. 103'928.50
- lavuors da sbodada construcziun sün tet existent	Anton Schmidt SA, Sent	fr. 24'557.20
- lavuors da toler	Anton Schmidt SA, Sent	fr. 31'884.70

- indriz parasajettas	Anton Schmidt SA, Sent	fr. 6'078.60
- lavuors da cuvratet	Anton Schmidt SA, Sent	fr. 100'228.60
- indriz da s-chodamaint	Benderer ScRL, Sent	fr. 259'718.60

La cumischiun dal proget vaiva fat divers sclerimaints, eir cul silvicultur, pertoccant l'installaziun d'ün s-chodamaint da ziplas invezza da quel da pellets. Finalmaing ha ella decis da propuoner al cussagl da desister da quella varianta. Motivs:

- per ün stabilimaint da sanaziun ais quell'installaziun problematica
- la differenzcha finanziaria ais considerabla
- i vess bsögnà üna construcziun nouva pel deposit

**895 790 PLANISAZIUN DAL TERRITORI**  
**Kolumbus immobiglias SA, Berna / dumonda per l'aquist da terrain da fabrica**

Il böt da l'aquist ais l'intent d'üna surfabricaziun d'üna residenza per persunas attempadas. Displaschaivelmaing nu po il cumün actualmaing spordscher la surfatscha bsögnaivla in stadi madür per gnir surfabrichada. Eir l'integraziun da terrain in üna zona adequata ais pel mumaint magari difficil.

**896 800.314.01 Mantegnimaint da chamonnas da paster**  
**Chamonna Charanella; dumonda da reponderaziun dals fittadins**

A quels d'eira gnü respus in scrit, cha'l cussagl nu po entrar sülla dumonda da garantir üna dürada da la fittanza da 10 ons, quai scha'ls fittadins prestessan lavuors da mantegnimaint sco eir da sanaziun dal tet. Uossa dumondan quels per üna reponderaziun da quella decisiun.

Il cussagl decida da restar pro sia decisiun fingià tratta, dimena da conceder la somma da fr. 6'000.00. Per ev. svouls da material ston ils fittadins s'abinar cul cumün. Üna garanzia per conceder üna fittanza da 10 ons nun ais pussibla da gnir concessa.

**897 860.503.04 Trafo Chavorgia**  
**Rimplazzamaint dal transformatur a Chavorgia / recuors preventiv davart ün'abitanta**

La petenta ha reagi sülla publicaziun da fabrica. Per avoir temp sufficiaint e per far ponderaziuns necessarias ha ella inoltrà in möd preventiv ün recuors. I'l fratemp ha il patrun da fabrica, l'Energia Engiadina, tut contact culla manzunada survart ed infuormà sur da l'intent da fabrica. Sco chi para ais la fatschenda sün buna via ed i's po prosumer, cha'l recuors ganrà retrat. La realisaziun dal proget sarà pür pussibla da l'on 2015.

**898 300.365.50 Contribuziuns e donaziuns diversas / cultura**  
**Chasa editura Scheidegger & Spiess, Turich; cudesch da fotografias / dumonda per ün sustegn finanziel**

Via sar Jachen Curdin Arquint ais gnü infuormà, cha la chasa editura manzunada planisescha la realisaziun d'ün cudesch da 80 fotografias cun persunalitads rumantschas da l'Engiadina e la Val Müstair. La fotografa, Julieta Schildknecht, creschüda sü a Brasilia, e Jachen Curdin Arquint, cugnuschader cumprovà da la terra ladina garantischan üna qualità excellenta. Il cumün da Sent ais rapreschantà prominentamaing in quel cudesch, dimena diversas persunalitads dal chomp cultural figüren in quel. La finanziaziun demuossa però ün deficit considerabel. Il cussagl decida, cun vusch unanima, da conceder la contribuziun dumondada da fr. 2'000.00 in sen d'üna promoziun da la cultura da nos cumün.

**Fusiun dals 6 cumüns / sezzüda dal cussagl transitoric**

Il capo orientesch'in fatschenda. Als 25 da gün 2014 ha lö üna radunanza d'infuormaziun a la populaziun concernent la constituziun cumünala. La banida e la comunicaziun da pressa cumparan prosmamaing, dimena als 13 da gün.

**Problematica sauaziun / sezzüda culs tangats e culs experts**

Il capo, A. Mayer, ed il cusglier dal dicasteri, M. Caviezel dan ün'orientaziun in fatschenda. Davart la scoul'ota da Rapperswil, signuors Gilgen e Küttel, ais gnüda preschantada l'expertisa, da la quala i's ais ün zich dischillus. Ils resultats nu satisfan ed i manca üna conclusiun clera. Ils respunsabels per l'expertisa prevezzan uossa da sclerir culla ditta chi ha furni ils filters quant squitsch d'aua cha quels cumportan, quai pervi cha quel punct pudess esser essenzial. I segua lura amo ün'ulteriura sezzüda in fatschenda culs specialists dal filter.

**Aual e lavuors in connex a Bügliöl / sezzüda cun ün abitant e culla cumischiun sindicatoria**

Il capo, A. Mayer, ed il cusglier dal dicasteri, M. Caviezel dan ün'orientaziun in fatschenda. Seguond il preschaint nun ais la definaziun dal text i'l fögl uffizial dal tuot güsta ed el ha pretais, cha quella gnäa corretta, quai chi'd ais i'l fratemp fingià success.

**Ingrondimaint da l'indiriz d'innaiver / sezzüda cul tangà**

Il capo, A. Mayer, il vicecapo, A. Poo ed il schef da god, M. Caviezel, han salvà üna sezzüda cul tangà in fatschenda.

A chaschun da quella ha quel però declarà, eir in nom da sia sour, d'ir d'accord cul proget previs ed uschè eir da suottascriver ün acconsentimaint per cha las lavuors pon gnir effectuadas.

**Società kinologica Engiadina Bassa / dumonda per ün arrandschamaint**

Quella prevezza da salvar darcheu l'üsità arrandschamaint militari per chans cun ustaria e quai als 7 da gün 2014 giò'n Tramlai. Ultra da quai permet'il cussagl il transit da veiculs als 6 e 7 gün sülla via Sur En – Tramlai – Via da sculpturas – Sur En a scopo da transports.

Intent da model - svilup dal territori persistent 2014 – 2018 / posiziun davart dals uffizis **federals involvats**

Da quella vart vain infuormà, cha nos proget previs, elavurà d'üna gruppa da planisaders cun O. Menghini, seguond protocol publichà nr. 91 dals 19 favrer 2014, nun ha displaschaivelmaing na pudü gnir resguardà resp. sustgnü. In tuot sun gnüts inoltrats 149 progets, ils quals sun lura gnüts valütats dals 8 uffizis federals in üna procedura successiva in möd cumünaivel e seguond criteris omogens Finalmaing han 33 da quels pudü gnir resguardats.

Il cussagl piglia cugnuschentscha e deplorescha quel fat.

Bogn Engiadina Scuol SA

Quel invid'a la 12avla radun. generala, venderdi, als 20 da gün 2014 / 20.00h. Marianne Werro rapreschaint'al cumün da Sent.

GURLAINA SA

Quella invid'a la 10avla radun. generala, mardi, als 24 da gün 2014 / 20.00h. M. Werro rapreschaint'al cumün da Sent.

DAV società germanaisa da las alps – giubileum 125 ons chamonna Heidelberg

Davart l'organisaziun ais gnü protramiss il program pels 29 – 31 d'avuost 2014. I nun ais pussibel bod ad ingün d'esser là da la partida. Collega, Men Caviezel sarà probabelmaing da la partida pel cumün da Sent.

**901**

**VARIA**

*Il cussagl discut'amo sur d'alchünas fatschendas marginalas e fixa alchüns termins.*

L'actuar:  
Marco Fallet

Il Capo:  
Albert Mayer